

# Heroenan Dj'awendia

Mi ta gusta chukulati. Un dia, mi kasá, Ingrid, tabata kumpra diferente provishon na Progreso Mini Market, i a disidí di hasi mi kurason kontentu ku un repi di chukulati, Cadbury's Fruit & Nut. Despues di paga pa e provishonnan, el a sali bai Playa, lubidando mi repi di chukulati den garoshi. Poko tempu despues, el a kòrda mi trit. Pensando ku ya kaba un pèrsona lo a bai ku e repi di chukulati, tòg el a regresá na Progreso. Ma promé ku e tabatin chèns pa papia, un bendedora a puntr'é si el a lubidá su repi di chukulati. E kahera a ward'é p'é!

Mientras mi tabata paga, mi famia tabata gosa nan eiskrim. Talbes tabata mi gana pa saboriá mi papureshi ku mi no a ripará ku mi a paga di mas. Ma kahera na Lover's Ice Cream si a nota esei i a debilbé e sèn ekstra.

Algun aña pasá, na Korona Supermarket, mi esposa tabata warda su turno tras di un señora ku aparentemente tabata kumpra provishonnan pa henter un aña—un kantidat enorme, de todo kaso. Un saku tras di otro a sali bai outo. Porfin e señora a keda kla, a drenta su outo, bai kas. Ingrid tabata na turno ora e kahera a ripará ku un saku di e señora a keda atras. Ora doño di pakus a tende, mes ora el a buska pa haña sa unda e señora ta biba pa e por hiba e saku pèrsonalmente na su kas!

Ora mi tata a realisá ku el a pèrdè su chèkbuk, el a regresá na e sitio unda el a kere ku esaki por a kai. Ma ya kaba el a desaparecé! E pèrsona ku a hañ'é, por skirbi hopi chèk, falsifiká su nòmber, i su kuenta lo keda blo bashí. El a bai na su banko purá, sera su kuenta, i a habri un kuenta nobo. Ma poko tempu despues, el a haña un yamada telefóniko. E stranhero na liña a splika ku el a haña su chèkbuk na tal sitio i ta ward'é p'é!

Nos ta biba den un era ku paginanan di korant ta yen di relatonan di hòrtamentu, atrako, korupshon, i engaño. Radio i televishon ta konta nos di un kaso tras di otro di ladronisia, robo, estafamentu, i desepshon di tur forma.

Nos por kuminsá kere ku TUR hende ta ladron...ku por konfia **ningun** hende mas. **Ma esei no ta bèrdat!** Tin HOPI hende onesto ku ta kana riba nos kayanan ainda, ta traha den nos tiendanan, ta drecha nos aparatonan, èts. No tur hende ta ignorá Dios Su mandamentunan: “no hòrta” (Eksodo 20:15) i “poneindo mentira un banda, kada un di boso papia bèrdat ku su próhimo” (Efesionan 4:25).

No tur hende ta falta integridat. Sin duda, nos tur a yega di topa hende ku a debilbé sèn ku nos a paga di mas, ku tabata onesto tokante e produkto ku nan kier a bende, ku a warda un artikulo òf sèn ku nos a pèrdè, ku a nenga gaña òf hòrta ora nan tabatin tur klase di oportunitat di hasié i keda ononimo!

Lastimamente ta hende desonesto ku ta haña publisidat den nos medionan di komunikashon. Ma kada dia, hende onesto ta nenga hòrta ora nan tin oportunitat...sin haña rekonosementu. Aktonan onesto no ta konsiderá sufisiente sensashonal pa kapta atenshon di e lesadó òf skuchadó.

Algun aña pasá, e revista *Reader's Digest* intenshonalmente a “pèrdè” 1100 pòtmòni na diferente sitio rònt mundu. Kada pòtmòni a kontené un suma di \$50 di moneda lokal i tambe un nòmber i adrès pa debilbé e pòtmòni. Na algun pais, poko di e pòtmòninan tabata debilbé: Italia, 35%; China, 30% i na Mexico solamente 21% pòtmòni a yega bèk serka e doño. En kontraste, na Noruega i Dinamarca, tur e pòtmòninan a wòrdu debilbé. E porsentehe tambe tabata haltu na Singapore (90%), Oustralia i Hapon (70%).

Skritura ta bisa, “Duna tur hende loke boso debe nan...si ta rèspèt, rèspèt; si ta onor, onor” (Romanonan 13:7). Sin duda, hende onesto ta digno di onor. Nan ta e heroénan silensioso ku ta hasi nan trabou tur dia sin ningun fanfaria pa loke nan ta hasi. E hendenan aki ta esnan ku ta e bèrdadero heroenan dj'awendia!